

Caepmaenh Gyahung Guh Yienghndei

注重巩固和发展 示范基地成规模

——Geiq Gveigangj Si Cinzdangz Gih Yawjnaek Caeuq Gyagiengz Hong Cuengh Gun Song Saw Vah Gyauyuz

□ bonjbauq gicej Vangz Sinhyungz dunghsinyenz Dwng Dwzlingz Huz Bangjhangz

[Vah bouxbien] Gih raeuz saedhengz Cuengh Gun song saw vah sonhag sawqniemh gaenq ndaej samcib lai bi, yienznaeuz saemxaemx saxsax, yienznaeuz saek seiz daemjndoet, hoeng, gyoengq beixnuengx guh hangh hong neix, mbouj lau dwgengz haemzhoj, gaenx mu fuengfap sonhag, lauxsaed haenqrengz bae guh ndei moix gienh saeh son ndei moix dangz saw, aeundaej le cingzcik yienhda, daeng haenh daeng danq! Daj geiz neix hwnj, bonjbauq dawz gij saeh ndei gij yiengh ndei hagdangz Cuengh Gun song saw vah raeuz sij okdaeuj daeng hawj daihgaya yawjyawj, muengh daihgaya caez daeuj cihciz, bangcoengh hangh hong neix guh ndaej engq ndei, engq hawj vunzlai habhoz!

Gveigangj Si Cinzdangz Gih laebbaenz cib lai bi gvaqdaeuj, ciepswnj caeuq raphwnj le diuzrap naek guh hong Cuengh Gun song saw vah gyauyuz, yawjnaek caeuq gyagiengz sonyinx nem guenlleix hong Cuengh Gun song saw vah gyauyuz, haenqrengz caepmaenh caeuq gyahung Cuengh Gun song saw vah gyauyuz cwngzgoj, gaenxgomx bae cauxlaeb aen gihdi guh yiengh ndei Cuengh Gun song saw vah sonhag, aeundaej cingzcik yienhda. Seizneix, Mungzgungh Yangh ndaw gih de miz Cuengh Gun song saw vah gyauyuz hagdangz gungh 7 aen cunh vanzsiuj caeuq aen cuhcungh ndeu, yozcenzbanh hagseng 516 vunz, siujyozswng 2150 vunz, cuhcungh-swngh 1375 vunz, loq ndaej guh baenz le aen Cuengh Gun song saw vah gyauyuz diji daj yozcen z gyauyuz daengz cuhcungh gyauyuz haenx.

Cibgeij bi daeuj, Cinzdangz Gih cien fueng bak geiq gaemdawz gij seizndei gak fuengmienh, gyalai roengzngaenz, haenqrengz sien anbaiz gaijndei gij diuzgen banhhag hagdangz Cuengh Gun song saw vah, dan 2011~2013 nienz, aen gih neix couh youq hengzguh hagdangz ancienz gunghcwngz, coihcingi ranz hagdangz daengj 214 aen hanghmoeg ndawde roengzngaenz 1000 lai fanh maenz, hawj Cuengh Gun song saw vah hagdangz aen' aen miz ranzhag moq, doenghyiengh sonhag moq, daizeij moq, banhhag diuzgen ndei gvaq dangdieg doengzloih hagdangz.

Cinzdangz Gih Cuengh Gun song saw vah hagdangz banhhag diuzgen ndei, ndeicawq lai, vunzlai caemh haenggyaez caeuq cihciz, caemh miz haujlai hagdangz sinhcingi saedhengz Cuengh Gun song saw vah sonhag.



▲ Gvangjsih Minzczuz Gyauyuz Fazcanj Cunghsinh cujyin Couh Gwzyih (baihgvaz boux daihsam) bae Cinzdangz diuyenz hong Cuengh Gun song saw vah gyauyuz.

► Gujsanh Siujyoz sifango yawjgonz gyausiz nanz mbouj nanz miz lingjdauj lauxsae bae dingq hwnjdangz.

Baenzneix, 2013 nienz, aen gih neix ciuq mizgven vwnzgen cingsaenz, dingh demgya Sinhlingj Siujyoz, Yinghngoz Siujyoz ndaw Mungzgungh Yangh guh Cuengh Gun song saw vah gyauyuz hagdangz, caemhcaiq hawj gij hagdangz neix lien baenz benq ndeu, ndaej fuengbienh guh gyauyenz hozdung, caemh fuengbienh guenlleix, hawj gveihmoz banhhag hwnj le mbaek moq ndeu.

Cib lai bi neix, Cinzdangz Gih laemxsim ca ndei hong cizlieng sonhag, gouz saed caux moq, mbouj-duenh daezsang cizlieng sonhag, doicaenh hong Cuengh Gun song saw vah sonhag yamqonj baenaj. Gyoengqde laeb ndei laeb caezcienz sonhag guenlleix cidu, dingh ok 《Cinzdangz Gih Cuengh Gun Song Saw Vah Hagdangz Sonhag Cangz-gveih Gihbwnj Yauhgiuz》 daengj haujlai guenlleix cidu, ca ndei gij hong gwnzdangz sonhag, gyagiengz gamyawj genjcaz cizlieng sonhag; doengzseiz gaenx guh diuyenz, youq ndaw gvaengz 《Sawcuengh Gocwngz Byauhcnj》 daez ok cungj lohnaemj sonhag moq baez mbaek gemjsiuj dangz vahcoj neix, couhwdg youq nienzgaep daemq Cuengh Gun caemhdangz son, nienzgaep gyang mbangj caemhdangz, nienzgaep sang caemhdangz siuj neix, aeundaej sonhag yaugoj yienhda.

Cinzdangz Gih yawjnaek hong gyauyenz Cuengh Gun song saw vah, bingzciengz cawz ciuq giva guh ndei cangzgeihsing gyauyenz hozdung le, lij cujiz gak gaep gyauyenz yinzyenz

doenggvaq gij hingz sik dingq, caz, yawj neix bae cienzmienh genjcaz, sonyinx gak aen hagdangz gyauyuz sonhag guenlleix, lauxsae sonhag cingzgvang, hagseng hagsib cingz-gvang, yaugoj haemq ndei. Doengzseiz cujiz Cuengh Gun song saw vah sonhag lauxsae cunggez sonhag ging-niemh, sij sonhag lunvwnz, camgya gak gaep yenzdaujvei caeuq sonhag lunvwnz bingzbeij, camgya gak gaep godiz yenzgiu, hag au gvingniemh, daezsang bonjfaenh.

Cinzdangz Gih yawjnaek hong beizyin lauxsae Cuengh Gun song saw vah, cujiz lauxsae camgya swcigih, si, yienh gaep Cuengh Gun song saw vah gyauyenz yenz, hagdangz yaucangj, gyaudauj cujyin, guzgan lauxsae beizyin caeuq "bak boux lauxsae Cuengh Gun song saw vah mizmingz" hanghmoeg beizyangj giva, sien anbaiz Cuengh Gun song saw vah lauxsae camgya "lajmbanj lauxsae suciz daezswng giva", "gozbeiz giva", "gihbeiz giva" daengj hanghmoeg beizyin; moix aen singhgiz lij cujiz lauxsae hag Sawcuengh, hawj gij lauxsae mbouj rox Sawcuengh roxnaeuz rox Sawcuengh mbouj lai haenx ndaej daezsang Sawcuengh sui jbingz, riengzlaeng ndaej guh hong Cuengh Gun song saw vah sonhag. Doengzseiz laeb aen gunghcozsiz lauxsae mizmingz, au lauxsae mizmingz guh daeuz, camgya caeuq banh gak cungj sonhag yenzgiu hozdung, caemhcaiq baij lauxsae mizmingz bae daengz hagdangz hwnj dangzgoq sifan, fazveih boux lauxsae

mizmingz guh yiengh ndei, sonyinx, dazyinx, daiqdoengh cozyung, au diemj daiq mienh, daezsang sonhag cizlieng, vih Cuengh Gun song saw va sonhag fuzvu, aeundaej yaugoj ndei.

Cib lai bi daeuj, Cinzdangz Gih lauxsaed haenqrengz bae guh hong Cuengh Gun song saw vah gyauyuz, aeundaej cingzcik maenhndei, moix bi hagseng camgya daengx gih siujyozswng Sawcuengh bizyez dungjgauj, cingzcik cungj dwg baiz youq daengx gih daih'it mingz, Sawgun sonhag cingzcik caemh cungj ndei gvaq dangdieg doengzloih hagdangz sui jbingz, okyienh le buek senhcin cizdij caeuq goyinz ndeu, baenz Gveigangj Si mbaw geiznding hong minzczuz gyauyuz ndeu, Swcigih gyauyuzdingh gonqlaeng 9 baez youq Cinzdangz Gih ciuhai Cuengh Gun song saw vah sonhag gunghcoz codanzvei, au gij hengzdoengh neix bae haengjdingh caeuq haenhdaq le gij cingzcik yienhda Cinzdangz Gih aeundaej haenx.

2013 nienz 5 nyied, Swcigih Gyauyuzdingh dingh Cinzdangz Gih guh Guengjsae Cuengh Gun song saw vah sonhag sifan gihdi, gijneix hawj Cinzdangz Gih gyoengqvunz guh hangh hong neix haenx gig souh gujvuj, caemhcaiq gig miz saenqsim. Seizneix gyoengqde cingq ra cinj dinghvi, yawj cinj muzbyauh, dingh ok le hengzguh fangh'an, ceng'au ciuq byauhcnj sang, yauhgiuz yiemz, cizlieng sang dwk bae guh ndei gak hangh hong, haenqrengz laebguh ndei sifan gihdi.



▲ Cinzdangz Gih Gyauyuzgiz cujiz Cuengh Gun song saw vah hagdangz yaucangj hag 《Sawcuengh Gocwngz Byauhcnj》.

